



Kantonales Sozialamt
Uffizi dal servetsch social chantunal
Ufficio del servizio sociale cantonale

USO Info 2024 | 01

L'uffizi dal servetsch social chantunal infurmescha

Preziada lectura, prezià lectur

In nov onn signifitga novas schanzas ed er novas perspectivas. Cordial bainvegni a l'emprima ediziun da nossa newsletter «USO Info – l'uffizi dal servetsch social chantunal infurmescha». Cun la newsletter As vegnin nus a dar duas giadas per onn invistas actualas da noss projects e da noss servetschs.

Nus As tegnain al current davart quai che capita en il sector social en il Grischun.

Vus survegnis nossa emprima newsletter, perquai che nus avain gi contact in cun l'auter durant ils ultims dus onns. Sche Vus na la vulais betg pli survegnir, cliccai per plaschair sin il link da disdir giudim dal tut. Vossa adressa vegn suenter stizzada da la banca da datas. Nus ans allegrain natiralmain, sche la newsletter As plascha e nus restain en contact vinavant.

Salids amicabels

Susanna Gadiant

Manadra da l'uffizi dal servetsch social chantunal dal Grischun

Ils temas en survista

- Abolì l'obligaziun da restituir las prestaziuns da l'agid social per personas giuvnas creschidas
- Plazzas da staziunament per personas cun moda da viver nomada – nova proposta da soluziun
- Deliberà la Strategia chantunala Dependenzas
- SafeZone
- Sviluppar vinavant l'organisaziun e la finanziaziun da l'agid social
- Nov post specialisà e da coordinaziun per l'egualità e per ils dretgs da las personas cun impediments
- Futur inclusiun – dis d'acziun 2024
- Savevas Vus che ...?

L'obligaziun da restituir las prestaziuns da l'agid social duai vegnir abolida per persunas giuvnas creschidas



Persunas giuvnas creschidas duain en l'avegnir vegnir deliberadas da l'obligaziun da restituir l'agid social durant lur emprima scolaziun. Ultra da quai duai la regulaziun existenta (art. 11 da la Lescha chantunala da sustegn, LS, DG 546.250) vegnir precisada e vegnir adattada a las Directivas da la COSAS. La finamira è l'egualitad

giuridica ed ina regulaziun unitara en il chantun Grischun.

La consultaziun è vegnida lantschada il december. Vus pudais prender posiziun fin ils 6 da mars 2024. [>Consultaziun](#)

Plazzas da staziunament per persunas cun moda da viver nomada – nova proposta da soluziun



Il chantun planisescha ina nova regulaziun per garantir plazzas da staziunament per persunas cun moda da viver nomada. La finamira è quella da reparter eventuels custs da l'agid social per las Svizras e Svizzers cun moda da viver nomada solidaricamain sin tut las vischnancas.

Uschia vul il chantun garantir plazzas da staziunament per Svizras e Svizzers cun moda da viver nomada.

Vus pudais prender posiziun fin ils 6 da mars 2024. [> Consultaziun](#)

Deliberà la Strategia chantunala Dipendenzas



Dipendenza ed in cumportament da consum ristgà pon chaschunar bleras suffrientschas. Per ils differents acturs en il sector da dipendenzas crescha la Strategia chantunala Dipendenzas ussa ina basa cuminaivla per garantir la qualitat e per sviluppar vinavant l'agid per persunas

dependentas en il Grischun.

La finamira è quella da garantir purschidas existentas e nua che quai è inditgà d'optimar talas e da serrar largias. La strategia definescha cumpetenzas e

promova la coordinaziun e la colliaziun dals acturs. En quest connex s'orientescha ella a las quatter pitgas da la politica da dependenza naziunala: prevenziun, terapia, reducziun da donns e regulaziun/execuziun.

> [Communicaziun a las medias](#) > [Strategia chantunala Dependenzas](#)

SafeZone.ch – Cussegliaziun online davart dumondas da dependenza

SafeZone.ch

Online-Beratung zu Suchtfragen

In team da passa 40 expertas ed experts da differents posts da cussegliaziun svizzers per dumondas da dependenza cusseglia personas pertutgadas e confamigliars en moda cumpetenta, segira ed anonima sin la plattafurma online SafeZone.ch. Ultra da la cussegliaziun persunala porscha la plattafurma

infurmaziuns davart il tema dependenza, tests persunals sco er adressas da posts specialisads locals.

SafeZone.ch è ina purschida da l'Uffizi federal da sanadad publica en collavuraziun cun ils chantuns, ils posts specialisads per dependenzas ed ulteriurs partenaris. Il chantun Grischun sa participescha dapi il 1. da schaner 2024 a la plattafurma d'internet naziunala per cussegliaziun online davart dumondas da dependenza. > [SafeZone.ch](#)

Sviluppar vinavant l'organisaziun e la finanziaziun da l'agid social



En il sistem da cooperaziun che vegn pratigà oz en il Grischun èn dus plauns statals cumpetents per las prestaziuns da l'agid social: L'agid social persunal (cussegliaziun) vegn fatg tras il chantun. L'agid social material (finanzial) prestan las vischnancas. La Regenza ha concludì ils 19

da december 2023 da sviluppar vinavant l'organisaziun e la finanziaziun da l'agid social sin basa da quest sistem.

L'ulteriur svilup è in element dal punct central da svilup en il Program da la Regenza 2025–2028. Emprimas mesiras vegnan actualmain planisadas, sco per exempel la digitalisaziun da la collavuraziun, il barat specific tranter il chantun e las vischnancas sco er l'access nunbirocratic da las personas basegnusas a l'agid social.

[> communicaziun a las medias](#)

Nov post spezialisà e da coordinaziun per l'egualità e per ils dretgs da las personas cun impediments



Il chantun Grischun survegn a partir da l'onn 2025 in post spezialisà e da coordinaziun per l'egualità e per ils dretgs da las personas cun impediments. Quai è ina da las mesiras che la Regenza ha concludì ils 30 da november 2023. Ils conclus sa basan sin in'analisa da la situaziun

ed in'analisa dal basegn ch'èn vegnidas realisadas l'onn 2023. En quest connex èsi vegnì examinà, quant bain ch'il chantun ademplescha ils dretgs da las personas cun impediments tenor la Convenziun da la ONU.

Per personas cun impediments ha il Grischun gia oz fitg buns servetschs en ils secturs d'abitar, da lavur, da sport e da cultura. Cun realisar las mesiras meglierescha il chantun vinavant la situaziun.

[> communicaziun a las medias](#)

Futur inclusiu – dis d'acziun 2024



**ZUKUNFT INKLUSION
AVENIR INCLUSIF
FUTURO INCLUSIVO
FUTUR INCLUSIUN**

10 onns Convenziun da l'ONU davart ils dretgs da las personas cun impediments e 20 onns Lescha davart l'egualità da personas cun


impediments. Quests dus giubileums festivescha la Svizra dals 15 da matg fin ils 15 da zercladur 2024. Il Grischun sa participescha e metta cun differentas acziuns in ferm segn.

Nus ans legrain, che las pli differentas organisaziuns ed interpresas s'engaschan cun acziuns en il chantun. Ils dis d'acziun en il Grischun daventan giagls e multifars cun acziuns en ils secturs da sport, cultura e temp liber, turissem, furnaziun e lavur, mobilitad e sanadad. [> futur inclusiu](#)

Savevas Vus che ...

... l'agid social importa mo 1,4 pertschient da las expensas en l'entira Svizra per la segirezza sociala?

**2021 ÈN VEGNIDAS IMPUNDIDAS 207 MILLIARDAS FRANCS PER LA
SEGIREZZA SOCIALA.** (STATISTICA SVIZRA DA L'ASSICURANZA SOCIALA 2021)



Savevas Vus che ...

... ils servetschs socials regiunals (SSoR) prestan dapli che mo sustegn finanzial? L'onn 2022 han las collavuraturas ed ils collavuratur dals SSoR cusseglià stgars 3500 clientas e clients. Main che la mesadad (1500) da quests cas han pertutgà l'agid social finanzial. Nossas collavuraturas e noss collavuratur cusseglian per gronda part en connex cun dumondas davart ils temas abitar, lavur, finanzas/preventiv, dependenza, migraziun, partenadi, educaziun, ma er en connex cun dumondas juridicas e dumondas davart las assicuranzas socialas.

Qua chattais Vus sustegn > [Cussegliaziun sociala e da dependenza](#)
> [Concept Cussegliaziun sociala en il chantun Grischun](#)
